

Martin Candinas chala – Josias Gasser resta ad interim

Mandats en dus parlaments a medem temp

DA CLAUDIA CADRUVI / ANR

■ **Ils dus deputads daventan novs cussegliers naziunals e mintgin agescha auter: Martin Candinas na turna betg pli en il cussegl grond, Josias Gasser bain.** Ils 5 da december a las 14.00 cumenza a Cuira la sessiun d'enviern dal cussegl grond. Ina mes'ura pli tard avra il parlament federal a Berna sia nova legislatura. 200 cussegliers naziunals vegnan saramentads, era *Martin Candinas* (pcd) e *Josias Gasser* (pvl). Els restan perquai tuttina deputads dal cussegl grond fin las proximas elecziuns chantunalas.

In plaz per Erwin Degonda

Candinas n'ha betg pli en senn da turnar en il cussegl grond. «L'emna passada hai jau gi mia davosa sesida da la cumissiun da sanadad ed ins ha elegì ina successura per mes presidi da cumissiun», di Candinas a l'anr. El haja annunzià al circol ch'el na gjaja betg pli en il cussegl grond. *Erwin Degonda* (pcd) vegnia a remplazar el. Degonda è l'emprim suppleant da la Cadi. El ha fatg il 2010 il meglier resultat dals tschintg suppleants dal circol.

«Per mai èsi adina stà chausa clera ch'jau na vom betg pli en il cussegl grond sch'jau vegn elegì a Berna», di Candinas. *Sep Cathomas* haja fatg il medem a sias uras. «Ins na duess betg esser dapertut.» Plinavant crodian ensemen mintg'onn duas sessiuns dal parlament federal e dal cussegl grond.

Verd-liberals perdessan in sez

«Jau vegn a salvar ad interim mia sutga», di Josias Gasser. En la sessiun da december na possia el sa chapescha betg esser en il cussegl grond e vegnia remplazzà d'in suppleant, ma il favrer haja el en senn da turnar. El veglia empruvar da coordinar la lavur en ils dus parlaments. Impurtant na sajan betg mo las sessiuns, mabain er ils termins da cumissiun. Sche memia blers termins sa cruschian, n'haja



Martin Candinas



Josias Gasser

quai naging senn d'occupar vinavant la sutga en il cussegl grond.

Gasser posseda gia experientscha cun politisar en dus lieus. Sper il cussegl grond ha el gi fin uss anc in mandat en il parlament da la citad da Cuira. Là vegn *Jürg Kappeler* a substituir Gasser en l'avegnir. En il cussegl grond perdessan

ils verd-liberals dentant il sez sche Gasser n'occupass betg pli el. Sch'in deputà na vegn betg pli remplazza l'emprim suppleant d'in circol mintgamai il parlamentari. En il circol da Cuira fiss quai *Yvonne Michel* (ps). «Sco partida na datan ins betg uschè gugent si in tal sez», conceda Gasser.

I n'è betg scumandà – perquai pia lubì

Seser en dus parlaments n'è betg scumandà. Ma esser en la regenza ed anc en il cussegl grond na va betg. La constituziun chantunala perscriva: «Naging po appartegnair a sia autoritad directiva da surveglianza.» Perquai ha *Barbara Janom*, cura ch'ella è daventada cussegliera governativa, stuì desister da ses mandat en il cussegl grond. Er emploiads da l'administraziun chantunala na dastgan betg esser en il parlament. *Rolf Hanimann* aveva perquai medemamain stuì desister dal

mandat da deputà cura ch'el era daventà veterinari chantunale. Per ils derschaders vala il medem, uschiglio pudessan els conceder davart las leschas, tenor las qualas els han da senzenziar.

Pertutgant mandats en dus parlaments na scrivian la constituziun e la lescha davart il cussegl grond nagut, di *Patrick Barandun* dal secretariat dal cussegl grond. Sch'i na saja betg scumandà explicitamain da seser en dus parlaments, saja quai pia lubì.